

DE  
**ALSINANTHEMO THALI,**  
 SEV  
 TRIENTALI HERBA IOANNIS BAYHINI,  
 AVCTORE  
*J. Amman.*

Tabula XIII.

**E**legantis huius plantulae in Botanicorum operibus saepe quidem mentio fit, nullibi tamen character illius bene designatur. Sunt qui ad Pyrolae genus retulerunt, sunt alii, qui peculiare exinde genus constituerunt; sed male omnes, vti ex sequenti descriptione patebit.

Primo statim vere, niue et glacie liquefactis, ex radice crassiuscula albente, longe lateque serpente, multasque fibras fortes emittente, albentes itidem, et alte admodum in terram demissas, cauliculus surgit singularis, teres, tenellus, glaber, non ramosus, biuncialis aut triuncialis, aliquando et spithamalis, prope radicem nudus et flavescent; huic ad unciae unius aut alterius in altioribus plantis a radice distantiam, adnascuntur foliola aliquot, tria utplurimum, nullis pediculis insidentia, quorum primum, radici scilicet proximum, vix duarum linearum longitudinem assequitur, secundum semunciali fere est longitudine, tertium autem uncialem iam et longiorem subinde obtinet. Ex cauliculi summitate folia alia oriuntur, multo maiora iis, quae cauliculi lateribus absque pediculis adnascuntur, in umbellae quodammodo speciem disposita,